




Maishi pelon, maishi chikito, maishi gobierno of maishi 7 siman, tur ta nombenan pa e maishi cu nos tur conocé bao di e nomber **MAISHI RABO**.

El a wordo trecí Curacao for di Africa den tempo di catibo. Pesey nan sa jamé tambe African Corn. E **MAISHI RABO** tabata cuminda pa e catibonan. For di Curacao nan a trecé Aruba, caminda el a bira mas popular ya cu aki nos tabata tin hopi cunukero, kendenan a sembra nan cunucunan grandi cu e simiya di **MAISHI RABO**.

E ta un mata cu no mester di hopi awa, sino e ta putri. E ta cla pa cosechá despues di 4 siman. Esun cu Gobierno a trece - esta Maishi Gobierno - ta mas duro y ta pari liher tambe. E maishi di 7 siman ta esun mas común y ta wordo cosechá, manera e nomber ta bisa, despues di 7 siman. Esaki ta duna dos cosecha pa aña.

E tapushi ta wordo cortá cu un cuchio especial. Nan ta bati e tapushi pa e maishinan cai y despues nan ta mulanan na hariña. Antes nan tabata mulanan na piedra - un piedra grandi hol y un otro chikito rondó cu ta pas net den e hol di e grandi, e "manga".

For di hariña di **MAISHI RABO** cu ta un alimento jen di fibra, nos conocé e famoso 'Pan Batí' y tambe e papa di **MAISHI RABO** cu ta un cuminda saludable pa muchanan.....

Un rat'i ora cu Tanta Dora Tempo di Plantamento




Com bai muchanan? Manera boso a ripará, awa a cuminsa jobe casi tur siman, pesey mi ta bai conta boso algo di plantamento. E temporada aki nos ta jama *tempo di aña*, en realidad esey ta cuminsa na juni. Promé ta cuminsa prepará e kunuku pa ora e awa di aña jega nos por planta. Ta chapi e tera cu un chapi plat, nos ta jama esey *bira tera*. Esaki ta pa e tera keda los y ora e awa jobe e ta penetrá den e tera. Tambe pa bestianan chikito cu ta biba den e tera muri, ya pa ora planta nan no ta mata e planchinan. Tin un sorto di bichi cu nos ta jama *kandelija*. E ta morde e matanan cu nan ta keda manera cu ta cu sker bo a corta nan. Nos ta bisa cu ta "*kandelija*" a corta e plantacion. Ora e awa jobe bon duro, ta bai planta. Cu un chapi di hoja (di coba) ta coba un buraco. Ta coi un stap grandi y ta coba otro y asina ta sigui. Entre cada buraco tin cu keda un espacio di un stap. Ta planta boonchi, maishi rabo, maishi grandi, pampoena, patia y milon. Den cada hojo ta pone cuatro simija. Hunto cu e maishi rabo ta planta patia, milon of pampoena ya cu e maishi rabo ta bai laira pero e patia, milon of pampoena ta rama abow. Promé cu planta e maishi rabo ta poné muha den awa pa dos of tres dia y e ta saca raíz ya e ta nace mas lihé. Nos ta bisa e ora ey e maishi ta na *hániko*. Si acaso bo a tira hopi simija den e hojo nos ta jama esey bo a sala e hojo. Ora pone e simija den e hojo ta deré cu bo pia no mucho duro pa e no pak. Ora e maishi nace ta ranka esnan cu ta di mas. Si tin hojo cu e maishi no a nace ta planta di nobo y nos ta jama esey *fura*. Mayor parti ta muchanan ta planta y esnan cu nan tata ta kunukero ta haya dia liber di scol pa planta.

Tambe nos ta planta pinda. Esey mester ta den un tera di hopi santo pa ora pone pinda chikito e por drenta facil den e tera. E pindanan chikito nos ta jama *sapato*, pasobra nan tin forma di un sapato. Ora ta kita e pinda berde pa herbé ta lanta e *halanan* (ramanan cu pinda colgá bao di dje) y ta piki e pindanan. Despues ta dera e *halanan* bek cu tera pa e mata sigui pari pinda. Despues di dos of tres biaha cu a kita pinda berde, ta laga e siguiente parí seka na e rama of *hala*. Ora nan ta seko ta ranka e mata, pone nan boca bow na monton pa nan seka.

Muchanan, otro biaha nos ta sigui tocante nos Plantacion, pasobra ta hopi co'i conta tin. Keda pendiente y te otro biaha.....!

Tanta Dora





CHABALITO

Number 2 - Año 2 - October, 1999 - Afl. 2,=

